

Inzko posjetio Vanjskotrgovinsku komoru BiH



Visoki predstavnik Valentin Inzko sastao se danas sa predsjednikom Vanjskotrgovinske komore BiH Brunom Bojićem i njegovim potpredsjednicima Veselinom Poljaševićem i Amirom Zukićem. Izražavajući zabrinutost zbog cjelokupne ekonomske situacije u BiH, te naročito zbog stalnog povećanja stope nezaposlenosti, visoki predstavnik i predstavnici Vanjskotrgovinske komore BiH složili su se da ekonomski oporavak treba biti shvaćen kao ključni prioritet za sve nivoe vlasti.

„Imenovanje novog Vijeća ministara je donijelo sa sobom dozu nade i optimizma. Posebno me ohrabruje što je premijer Bevanda stavio naglasak na evropske integracije i ekonomiju, uključujući usvajanje državnog budžeta za 2012. godinu, kao ključne prioritete Vlade“, naglasio je Inzko. On je pozvao odgovorne vlasti da hitno poduzmu konkretne mjere kako bi se zaustavio negativan trend i stimulirao ekonomski napredak.

„Ove mjere se moraju poduzeti u konsultacijama sa poslovnom zajednicom, uključujući Vanjskotrgovinsku komoru BiH“, rekao je visoki predstavnik Inzko. „Predstavnici poslovne zajednice mogu najbolje govoriti o situaciji na terenu i zagovarati značajne promjene. Oni su pouzdan i vrijedan partner vlasti“, zaključio je visoki predstavnik Valentin Inzko.